

REGIONAL NEWS UNIT  
ALL INDIA RADIO, AGARTALA  
Date: 30-05-2024  
Time: 07:55-08:05 PM Hrs  
BENGALI EVENING BULLETIN

---

**Headlines :**

- (১) আগরতলা লামডিং রেলপথ আজও বন্ধ রয়েছে ।
- (২) অষ্টাদশ লোকসভা নির্বাচনের সপ্তম এবং চূড়ান্ত পর্বের প্রচার আজ শেষ হয়েছে ।
- (৩) ত্রিপুরা সহ উত্তর-পূর্বাঞ্চলের প্রায় সবকটি রাজ্যে আজ আনুষ্ঠানিকভাবে বর্ষা প্রবেশ করেছে ।

\*\*\*\*\*

**Rail :**

আগরতলা লামডিং রেলপথ আজও বন্ধ রয়েছে। এই রুটে দূরপাল্লার কোনো ট্রেন চলাচল করেনি। আজ আগরতলা থেকে দূরপাল্লার চারটি ট্রেন বাতিল করা হয়েছে। এগুলো হলো কাঞ্চনজঙ্ঘা, এলটিটি, ত্রিপুরা সুন্দরী এবং আগরতলা গুয়াহাটি স্পেশাল ট্রেন। নিউ হাফলং এলাকায় রেল ট্র্যাক থেকে জল মাটি সরানোর কাজ অব্যাহত রয়েছে। তবে পাহাড়ে প্রবল বর্ষণের ফলে রাস্তা পরিষ্কারের কাজ ব্যাহত হচ্ছে বলে জানিয়েছেন আগরতলার রেল স্টেশন মাস্টার চন্দ্রমোহন সাহু।

\*\*\*\*\*

### **Assam-Flood :**

অসমে অবিরাম বৃষ্টির ফলে আটটি জেলায় বন্যা পরিস্থিতি সৃষ্টি হয়েছে। বহু নদীর জলস্তর দ্রুত বাড়ছে। এখন পর্যন্ত পাঁচজনের মৃত্যুর খবর পাওয়া গেছে। বন্যায় ক্ষতিগ্রস্ত জেলাগুলো যথাক্রমে কাছাড়, করিমগঞ্জ, হাইলাকান্দি, নগাঁও, কারবি আংলং, পশ্চিম কার্বি আংলং, হোজাই এবং গোলাঘাট। অন্যদিকে ভূমি ধ্বস হয়েছে ডিমা হাসাও জেলার ১১টি স্থানে, কাছাড়ের তিনটি এবং হাইলাকান্দির একটি স্থানে। করিমগঞ্জের লঙ্গাই, সিংলা, কুশিয়ারা, কাছাড়ের বরাক কাটাখাল ও হাইলাকান্দির ধলেশ্বরী নদী এবং উপনদীগুলির জল বিপদসীমার ওপর দিয়ে প্রবাহিত হচ্ছে।

\*\*\*\*\*

### **Election, 7th phase :**

অষ্টাদশ লোকসভা নির্বাচনের সপ্তম এবং চূড়ান্ত পর্বের প্রচার আজ শেষ হয়েছে। এই পর্বে ৭টি রাজ্য ও ১টি কেন্দ্র শাসিত অঞ্চলের ৫৭টি সংসদীয় আসনে ভোট হবে পয়লা জুন। এই পর্বে মোট ৯০৪ জন প্রার্থী প্রতিদ্বন্দ্বিতা করছেন। আগামী চৌঠা জুন সমস্ত আসনের ভোট গণনা করা হবে।

\*\*\*\*\*

### **Power Press Meet :**

বিদ্যুৎ সরবরাহ সমস্যার স্থায়ী সমাধানের উদ্দেশ্যে মাটির নীচ দিয়ে পরিবাহী লাইন টানার উদ্যোগ নিয়েছে বিদ্যুৎ দপ্তর। আজ মহাকরনে এক সাংবাদিক সম্মেলনে বিদ্যুৎ দপ্তরের সচিব অভিষেক সিং এ খবর জানান। তিনি বলেন, প্রাথমিকভাবে

আগরতলা শহরের মাটির নীচ দিয়ে বিদ্যুৎ লাইন টানার পরিকল্পনা নেওয়া হয়েছে। ঘূর্ণিঝড় রেমালের তাড়বে বিদ্যুৎ পরিবাহী ব্যবস্থার ব্যপক ক্ষতি হয়েছে। প্রাথমিক হিসাব অনুযায়ী বিদ্যুৎ নিগমের ৫ কোটি টাকারও বেশি ক্ষতি হয়েছে।

\*\*\*\*\*

#### **Sabroom Visit :**

দক্ষিণ জেলার পুলিশ অধীক্ষক অশোক কুমার সিনহা আজ সাব্রুম মহকুমা শাসকের কার্যালয়ে পূর্ব ত্রিপুরা লোকসভা আসনের সাব্রুম ও মনুবাজার বিধানসভা কেন্দ্রের স্ট্রং রুমটি পরিদর্শনে যান। সাব্রুমের মহকুমা শাসক শিবজ্যোতি দত্ত ও মহকুমা পুলিশ আধিকারিক নিত্যনন্দ সরকারও তাঁর সঙ্গে ছিলেন। চৌঠা জুন গণগার দিনের নিরাপত্তা ব্যবস্থা নিয়ে মহকুমা শাসক ও মহকুমা পুলিশ আধিকারিকের সঙ্গে বৈঠক করে নিরাপত্তা ব্যবস্থা সম্পর্কে প্রয়োজনীয় নির্দেশ দেন তিনি।

\*\*\*\*\*

#### **DM & SP-South :**

দক্ষিণ জেলার জেলা শাসক ও জেলা নির্বাচনী আধিকারিক সিদ্ধার্থ শিব জয়সওয়াল ও জেলা পুলিশ সুপার অশোক কুমার সিনহা আজ শান্তিরবাজার মহকুমা শাসক অফিসে স্ট্রং রুম পরিদর্শন করেন। তারা স্ট্রং রুমের নিরাপত্তা ব্যবস্থা খতিয়ে দেখেন।

\*\*\*\*\*

#### **All Political parties Meeting :**

গ্রাম পঞ্চায়েত, পঞ্চায়েত সমিতি ও জিলা পরিষদ এই ত্রি-স্তরীয় আসন্ন নির্বাচনকে সামনে রেখে ঊনকোটি জেলাতে জোর প্রশাসনিক তৎপরতা চলছে। ইতিপূর্বেই ভোটকেন্দ্রের খসড়া তালিকা প্রকাশিত হয়েছে। খসড়া তালিকা অনুসারে ঊনকোটি জেলাতে পোলিং বুথ রয়েছে, ২৩৪টি। খসড়া তালিকার বিষয়ে দাবি ও আপত্তি জানানোর সময়সীমা গতকাল-ই শেষ হয়েছে। চূড়ান্ত তালিকা প্রকাশিত হবে আগামী তেসরা জুন।

এদিকে আসন্ন পঞ্চায়েত নির্বাচন উপলক্ষ্যে প্রশাসনিক প্রস্তুতিপর্ব বিষয়ে আজ কৈলাশহরস্থিত D.M কনফারেন্স হলে বিভিন্ন রাজনৈতিক দলের প্রতিনিধিদের নিয়ে এক সর্বদলীয় বৈঠক অনুষ্ঠিত হয়। এতে সভাপতিত্ব করেন, ঊনকোটি জেলার জেলা শাসক দিলীপ কুমার চাকমা। আজকের বৈঠকে B.J.P, কংগ্রেস, C.P.I (M), তনমূল কংগ্রেসের প্রতিনিধিরা অংশ নেন।

\*\*\*\*\*

#### **All Party Meeting :**

উত্তর ত্রিপুরা জেলায় লোকসভা নির্বাচনের ভোট গণনা সুষ্ঠুভাবে করার জন্য আজ ধর্মনগরে এক সর্বদলীয় বৈঠক অনুষ্ঠিত হয়। বৈঠকে উপস্থিত ছিলেন উত্তর জেলার জেলাশাসক দেবপ্রিয় বর্ধন, পুলিশ সুপার ভানুপদ চক্রবর্তী, ধর্মনগর, পানিসাগর, কাঞ্চনপুর এর মহকুমা শাসকগণ ও বিভিন্ন রাজনৈতিক দলের প্রতিনিধিগণ।

\*\*\*\*\*

#### **All party Meeting, Gomati :**

ত্রি-স্তরীয় পঞ্চায়েত নির্বাচনকে সামনে রেখে আজ গোমতী জেলা শাসকের অফিসে এক সর্বদলীয় বৈঠক অনুষ্ঠিত হয়। বৈঠকে জেলাশাসক তড়িৎ কান্তি চাকমা ত্রি-স্তরীয় পঞ্চায়েত নির্বাচনের বিভিন্ন দিক নিয়ে আলোচনা করে নির্বাচনের কাজে সকলের সহযোগিতা কামনা করেন ১ জেলা শাসক জানান, গোমতী জেলায় ৭০ টি গ্রাম পঞ্চায়েত এর ৭৩৬ টি আসনে ভোট হবে । এছাড়াও পঞ্চায়েত সমিতির ৪৮ টি আসন, জিলা পরিষদের ১৩ টি আসনে ভোটের প্রস্তুতি শুরু হয়েছে ১

\*\*\*\*\*

#### **Counting-East Tripura :**

পূর্ব ত্রিপুরা লোকসভা আসনে ভোট গণনা শান্তিপূর্ণভাবে সম্পন্ন করার জন্য আজ ধলাই জেলা শাসকের কার্যালয়ে এক সর্বদলীয় বৈঠক অনুষ্ঠিত হয়। উপস্থিত ছিলেন পূর্ব ত্রিপুরা লোকসভা কেন্দ্রের রিটার্নিং অফিসার সাজু ওয়াহিদ এ। তিনি জানান, সব কয়টি গণনা কেন্দ্র ও তার চারপাশ ব্যাপক নিরাপত্তা ব্যবস্থা থাকবে।

\*\*\*\*\*

#### **Vote Counting :**

আগামী চৌঠা জুন পশ্চিম ত্রিপুরা লোকসভা আসনের ভোট গণনার পাশাপাশি রামনগর বিধানসভা কেন্দ্রের উপনির্বাচনেরও ভোট গণনা হবে উমাকান্ত একাডেমিতে। পশ্চিম ত্রিপুরা জেলার রিটার্নিং অফিসার ডক্টর বিশাল কুমার আজ বিভিন্ন রাজনৈতিক দলের প্রতিনিধিদের নিয়ে ভোট গণনা কেন্দ্র পরিদর্শন করেন।

সঙ্গে ছিলেন পশ্চিম জেলার পুলিশ সুপার কিরণ কুমার কে সহ নির্বাচন দপ্তরের অন্যান্য আধিকারিকরা।

\*\*\*\*\*

#### **Update Akashvani :**

শ্রোতাবন্ধুরা, আকাশবাণীর সংবাদ সহ বিবিধ খবরের বিস্তৃত আপডেট পেতে লগ ইন করুন - ডব্লিউ, ডব্লিউ, ডব্লিউ ডট, নিউজ অন এআইআর ডট কম এবং নিউজ অন এআইআর অ্যাপ, এবং টুইটার অর্থাৎ এক্স প্ল্যাটফর্মে। আপডেট পেতে দেখুন আকাশবাণী নিউজ আগরতলা / ফেসবুকে এআইআর নিউজ আগরতলা এবং ইউ টিউবে এআইআর নিউজ আগরতলা।

\*\*\*\*\*

#### **Detain of 3 Bangladeshi :**

বেআইনি অনুপ্রবেশের অভিযোগে আজ চন্দ্রপুর আইএসবিটি থেকে এক মহিলা সহ তিনজন বাংলাদেশী নাগরিককে আটক করা হয়েছে। পূর্ব থানার ওসি সঞ্জিত সেন এখবর জানিয়েছেন।

\*\*\*\*\*

#### **BJYM press meet :**

যুব মোর্চার মুখপাত্র অম্লান মুখার্জী আজ আগরতলায় এক সাংবাদিক সম্মেলনে দাবি করেন শিক্ষা, স্বাস্থ্য সহ বিভিন্ন উন্নয়নমূলক কাজকর্মের রাজ্য সরকার সঠিক পদক্ষেপ নিচ্ছেন। অথচ সিপিআইএম সহ বিরোধী দলগুলি রাজ্য সরকারের বিরুদ্ধে অপপ্রচার করছে। এর প্রতিবাদে আগামী পয়লা জুন যুব মোর্চা সারা রাজ্যে প্রতিবাদ মিছিল সংগঠিত করবে বলে শ্রী মুখার্জী

জানান। সাংবাদিক সম্মেলনে উপস্থিত ছিলেন বিজেপি যুব মোর্চার সহসভাপতি ভিকি প্রসাদ ও সাধারণ সম্পাদক শুভঙ্কর সাহা প্রমুখ।

\*\*\*\*\*

**Meet with SP Gomati :**

গোমতী জেলা কংগ্রেসের সভাপতি টিটন পালের নেতৃত্বে এক প্রতিনিধি দল আজ গোমতী জেলা পুলিশ সুপার নামিত পাঠকের সঙ্গে বৈঠক করেন। এই বৈঠকে গোমতি জেলার আইন-শৃঙ্খলা পরিস্থিতি শান্তিপূর্ণ রাখার জন্য কংগ্রেসের পক্ষ থেকে পুলিশ সুপারকে অনুরোধ জানানো হয়। এর আগে বাগমা, মাতাবাড়ি, আর কে পুর, কাকরাবন-শালগড়া বিধানসভা এলাকার কর্মীদের নিয়ে উদয়পুর জেলা কংগ্রেস ভবনে এক বৈঠক অনুষ্ঠিত হয়। উপস্থিত ছিলেন পিসিসি সদস্য জীবন ঘোষ, ব্লক সভাপতি আরত বাহাদুর মলসম, রনজিৎ দেবনাথ, জয়দেব কান্তি রায়, নিত্যগোপাল সাহা, জেলা যুব সভাপতি সম্রাট দাস প্রমুখ।

\*\*\*\*\*

**Deputation to DM-Gomati :**

ডিওয়াইএফআই-এসএফআই-টিওয়াইএফ-টিএসইউ উদয়পুর বিভাগীয় কমিটির পক্ষ থেকে আট দফা দাবির ভিত্তিতে আজ গোমতী জেলা শাসকের কাছে ডেপুটেশন প্রদান করা হয়। উল্লেখযোগ্য দাবিগুলির মধ্যে ছিল বিদ্যাজ্যোতি স্কুলগুলিতে শিক্ষক সংকট, পরিকাঠামো সমস্যা নিরসন করা, ছাত্রছাত্রীদের সঠিক ও গুণগত শিক্ষা প্রদান, বিদ্যুৎ পরিষেবাকে স্বাভাবিক রাখতে প্রয়োজনীয় উদ্যোগ গ্রহণ করা, গোমতী জেলা হাসপাতাল-সহ

উদয়পুর মহকুমায় মহকুমা ও প্রাথমিক স্বাস্থ্যকেন্দ্রগুলিতে পর্যাপ্ত পরিমাণে চিকিৎসক, নার্স ও চিকিৎসা কর্মী নিয়োগ করা। ডেপুটেশন প্রদানের সময় প্রতিনিধি দলে ছিলেন ডিওয়াইএফআই উদয়পুর বিভাগীয় সভাপতি ফারুক আহমেদ, সম্পাদক শুভ চক্রবর্তী, টিওয়াইএফ বিভাগীয় সম্পাদক রাজেন্দ্র জমাতিয়া, এসএফআই বিভাগীয় সম্পাদক প্রীতম শীল, ডিওয়াইএফআই বিভাগীয় সম্পাদকমন্ডলীর সদস্য মির হোসেন চৌধুরী।

\*\*\*\*\*

#### **World No Tobacco Day :**

আগামীকাল বিশ্ব তামাক বিরোধী দিবস। এই উপলক্ষে আগরতলা সরকারি মেডিকেল কলেজে ধূমপান ও তামাকের ক্ষতিকারক বিষয়গুলি সম্পর্কে জনগণকে সচেতন করার উদ্যোগ গ্রহণ করা হয়েছে। এই কর্মসূচিতে উপস্থিত থাকবেন জিবি ও ক্যান্সার হাসপাতালের মেডিক্যাল সুপারিনটেনডেন্ট, আগরতলা সরকারি মেডিকেল কলেজের অধ্যক্ষ ও কমিউনিটি মেডিসিনের বিভাগের প্রধান। তাছাড়া রাজ্যের প্রতিটি জেলা ও মহকুমা হাসপাতাল, প্রাথমিক স্বাস্থ্য কেন্দ্র, সাব সেন্টারেও এই কর্মসূচির আয়োজন করা হবে।

\*\*\*\*\*

#### **CITU :**

CITU রাজ্য কমিটির উদ্যোগে আজ আগরতলায় CITU-র পঞ্চাশতম প্রতিষ্ঠা দিবস উদযাপন করা হয়। উপস্থিত ছিলেন সংগঠনের রাজ্য সভাপতি মানিক দে, সংগঠনের মহিলা নেত্রী পাঞ্চালী ভট্টাচার্য, জয়া বর্মন প্রমুখ।



\*\*\*\*\*

**CITU-Sonamura :**

CITU সোনামুড়া মহকুমা কমিটির উদ্যোগে আজ সোনামুড়ার রবীন্দ্র চৌমুহনীতে ২ ঘণ্টার গন-অবস্থান পালন করা হয়। ১৩ দফা দাবির ভিত্তিতে আয়োজিত এই কর্মসূচিতে উপস্থিত ছিলেন সংগঠনের রাজ্য সম্পাদক মন্ডলীর সদস্য অহিদুর রহমান, মহকুমা সম্পাদক শ্যামল মজুমদার, বিধায়ক শ্যামল চক্রবর্তী প্রমুখ। উল্লেখযোগ্য দাবিগুলির মধ্যে ছিল রেগার মজুরি ৬০০ টাকা করা ও ২০০ দিনের কাজ প্রদান।

\*\*\*\*\*

**Blood Donation Camp :**

রামঠাকুর কলেজ এন.এস.এস ইউনিটের উদ্যোগে আজ থেকে সাত দিনের এক বিশেষ শিবির শুরু হয়েছে। আজ প্রথমদিনে এক রক্তদান শিবিরের আয়োজন করা হয়। প্রধান অতিথি হিসেবে উপস্থিত ছিলেন এন.এস.এস-এর রাজ্য আধিকারিক প্রবাল কান্তি দেব। শিবিরে মোট ৩৪ জন স্বৈচ্ছায় রক্ত দান করেন।

\*\*\*\*\*

**Felicitatation 4 students-Udaipur :**

ডিওয়াইএফআই-এসএফআই উদয়পুর বিভাগীয় কমিটির পক্ষ থেকে ত্রিপুরা মধ্যশিক্ষা পর্ষদ পরিচালিত উচ্চমাধ্যমিক পরীক্ষায় গোমতি জেলার চার কৃতি ছাত্রছাত্রীকে সংবর্ধনা জানানো হয়। ডিওয়াইএফআই-এসএফআই নেতৃবৃন্দ কৃতিদের হাতে স্মারক উপহার তুলে দেন।

\*\*\*\*\*

### Heatwave :

উত্তর-পশ্চিম এবং মধ্য ভারতে তাপপ্রবাহ অব্যাহত রয়েছে। গরমে হাঁসফাঁস করছে দিল্লি, রাজস্থান, পঞ্জাব, হরিয়ানা, এমনকি জম্মু ও কাশ্মীর এবং হিমাচল প্রদেশের মানুষ। ভারতীয় আবহাওয়া দফতর জানিয়েছে, আগামীকাল পর্যন্ত এই তাপপ্রবাহ বিরাজ করবে।

জয়পুর আইএমডি-র অধিকর্তা রাধেশ্যাম শর্মা জানিয়েছেন, আগামী ৪৮ ঘণ্টার মধ্যে রাজস্থানে, ২ থেকে ৩ ডিগ্রি পর্যন্ত কমতে পারে তাপমাত্রা।

\*\*\*\*\*

### Weather :

ত্রিপুরা সহ উত্তর-পূর্বাঞ্চলে প্রায় সবকটি রাজ্যে আজ আনুষ্ঠানিকভাবে বর্ষা অর্থাৎ দক্ষিণ পশ্চিম মৌসুমী বায়ু প্রবেশ করেছে। স্বাভাবিক সময়ের চেয়ে প্রায় ১ সপ্তাহ আগে এবার বর্ষা এসে গেছে। গত বছর ১০ই জুন রাজ্যে বর্ষা প্রবেশ করেছিল। এদিকে, আবহাওয়া দপ্তরের পক্ষ থেকে জানানো হয়েছে, আগামী চব্বিশ ঘণ্টায় রাজ্যের সব জেলায় বজ্র বিদ্যুত সহ বৃষ্টিপাত সঙ্গে ঘণ্টায় ত্রিশ থেকে চল্লিশ কিলোমিটার বেগে ঝড়ো হওয়া বয়ে যেতে পারে। উনকোটি উত্তর এবং ধলাই জেলায় বিক্ষিপ্তভাবে বজ্র বিদ্যুত সহ ভারী বর্ষণের সতর্কতা জারি করা হয়েছে। আগামীকাল আকাশ সাধারণত মেঘাচ্ছন্ন থাকবে। কিছু কিছু জায়গায় বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের সম্ভাবনা রয়েছে। আগামীকাল তাপমাত্রা সর্বোচ্চ

চৌত্রিশ ডিগ্রী এবং সর্বনিম্ন সাতাশ ডিগ্রী সেলসিয়াস এর  
কাছাকাছি থাকবে। আজ দিনের সর্বোচ্চ তাপমাত্রা ছিল পঁয়ত্রিশ  
ডিগ্রী এবং সর্বনিম্ন সাতাশ দশমিক আট ডিগ্রী সেলসিয়াস।

\*\*\*\*\*